

CONVIVENZA

Midadas

BETTINA CADOTSCH

Tschel di hai jau vis questa frasa cun guardar tras in magazin: «If nothing changes, nothing will change.» Per rumantsch vul quai dir: «Sche nagut na sa mida, na sa mida nagut.» Simpel, curt ed uschè vaira, hai jau pensà cun leger quests plets.

Ch'ins po leger ina tala construcziun l'atun na ma fa betg surstar. L'atun stat numnadain simboli-camain per midadas. La color da la feglia sa mida, las temperaturas sa sbassan ed ils dis vegnan pli curts. Mintg'onn sun jau puspè dal tutfatg intgantada da quest process da transfurmaziun ed el ma lascha mintgamai reflectar mia vita. E quest citat m'ha laschà far patratgs davart midadas.

Jau hai il sentiment che nus umans hajan ina relaziun fitg speziala cun midadas. Tant enavant avain nus adina puspè il giavisch da far midadas. Nus lain lavurar auter, nus lain viver a moda pli simpla, nus lain giudair dapli la vita. Nus lain dapli cuntentientscha, dapli success e damain problems – per numnar mo in pèr exempels.

A mai pari savens che nus hajan il sentiment che las chaussas sa midan senza ch'ins stoppia far insatge. Nus reclamain da temp en temp davart ina u l'autra chaussa, n'essan però



betg pronts da far il sforz necessari per far ina midada. Nus discurren da giavischs senza che nus vegnian per finir concrets.

Quai ha mintgant da far cun la cumadaivladad, il schlantsch e la perseveranza. Jau pens ch'i saja mintgant dentant era grev per nus da propi far las midadas che nus giavischain, perquai che nus avain tema da las consequenzas che la midada chaschuna. Tge èsi, sche quai ch'era avant era tuttina meglier che quai ch'è uss? Tge èsi, sche jau m'enriclel davart mia decisiun? Tge èsi, sche jau less puspè far in pass enavos? Ins è tut il temp vi da passantar diversas opziuns. Nus pudain bain stimar in pau las consequenzas, però propi savair co ch'insatge vegn savain nus pir pli tard.

Jau sun da l'avis che nus ans impedeschian en cas da midadas tranteren era nus sez, perquai che nus spetgain sin il mument per-

fect per far la midada. Ma datti insumma quel? Sche gea, co percorsch'ins quai? Baiduras dovri mettain simplamain in emprim pass u in emprim stausch, era sche quai dovra curaschi.

Sche tut la glied n'avess mai ristgà da midar insatge, lura na fiss mai sa midà insatge. Ed igl è gia adina stà uschia, pli baud sco er ussa: Igl è simplamain er adina puspè temp per far midadas. Quai è bun per la populaziun, per l'ambient e per nus sez. Tut cumenza ina giada e quasi tut fine-scha ina giada.

Ed era sche betg mintga midada na maina directamain ad insatge che procura per in'optimaziun, i dat segir puspè in'ulteriura midada ed in'ulteriura pussaivladad che tut vegn puspè meglier. Quai ans stua in nus simplamain adina puspè far endament. Nagut na sto restar uschia sco quai ch'igl è. E nus stua in tranteren simplamain avoir il curaschi e la veglia da midar insatge ed ans distatgar da pensiers ch'ans impedeschian da prender per mauns nossa vita. Sullettamain uschia sa mida insatge.

Bettina Cadotsch è creschida si a Savognin. Ella ha studegià Multimedia Production a la Scuola auta spezialisada dal Grischun a Cuir e lavura ussa tar Radio Südostschweiz, «suedostschweiz.ch» e la «Südostschweiz».

La convivenza da linguas e culturas cumpara mintgamai glindesdi en La Quotidiana ed en La Südostschweiz.